

# 13% dals novs recruts èn Grischuns

Cuira: Entschatta da la scola da recrut

DA GION NUTEGN STGIER / FMR

■ Ier ha cumenzà per 660 mats e quatter mattas la scolaziun militara che cuzza 18 emnas. Il dumber da recruts e dal cader è tar 825 umens. Cumanant da la scola da recrut è colonel dal stab general Daniel Steiner da Savognin. Bler travagl ier a l'areal da la caserna a Cuira. La raschun è ch'in bel dumber giuvens e singulas giuvnas èn entrads en servetsch da militar. La scola da recrut d'infanteria 12 (Inf RS 12) dura fin ils 5 da matg 2020. Dapi dus onns è colonel dal stab general Daniel Steiner, il Surmiran, cumanant da quella truppa d'infanteria a Cuira. El ha er dà pled e fatg als meds da massa cun ina survista dal decurs da la recruta.

## 86 recruts dal Grischun

Dals 660 mats ch'han cumenzà ier la scola da recrut derivan 86 giuvens dal Grischun. Quai è radund 13% dal dumber total dals recruts. Tranter ils 86 giuvens Grischuns sajan er ca. 12 da regiuns rumantschas, ha ditg il cumanant da la scola da recrut d'enviern. Bunamain 12% dals cumpogns ch'èn entrads ier en servetsch militar èn oriunds dal chantun Tessin. Ina buna part dals auters umens è da chasa en ils chantuns Appenzell, Glaruna, Schaffusa, Turgovia e Turtig.

Tut tenor funcziun èn da la partida a Cuira er singuls umens dals auters chantuns da la Svizra tudestga per frequentar la recruta. 4% derivan da la Romandie,



Salutar durant las proximas 18 emnas: In'estructura mussa a recruts da Cuira co quai sto vegnir fatg.

FOTO O. AEBLI-ITEM

ditg concret dals chantuns Geneva, Neuschatel e Vad. Al cader tutgan 161 umens, 26 uffiziers che gudognan las cordas, nov sutuffiziers (primsergents e

furiers) e lura 126 sergents e da quels schizunt duas dunnas. Per la scolaziun ed assistenz èn er anc responsabels 37 umens dal militar professunal.

## Quatter cumpagnias

La scola da recrut d'infanteria 12 cumpiglia quatter cumpagnias cun var 200 fin 220 schuldads. Duas cumpagnias èn

da l'infanteria, ina per il sustegniment da l'infanteria ed ina da l'infanteria da segirezza. Fin la 12avla emna da la recruta èn tuttas quatter cumpagnias staziunadas a Cuira (trais en la caserna ed ina en il chantunamanet da la citad da Cuira) e suenter be trais, cun ina da l'infanteria midar da Cuira al St. Luzisteig.

## Instrucziun fundamentala

Durant 12 emnas retschaivan ils recruts in'instrucziun fundamentala per las armas, per tuts guaffens e vehichels. Da la 13avla fin 18avla emna stat sin il program dasper l'instrucziun da furmaziun er anc il tir da cumbat sin stgalim secziun e cumpagnia. Vers la fin da la scola da recrut na manca er betg in marsch da 50 km (regiun Cuira-Tusaun-Tavau-Maiavilla) e lura er l'emna da perseveranza (Durchhaltewoche). Il di per ils parents, quel ha lieu ils 17 d'avrigl a Cuira ed al St. Luzisteig.

## Quatter scolas da recrut d'infanteria

Per onn datti en Svizra 18 000 recrutas e recruts. Da quels dastgan be 15% far lur servetsch militar senza interrupziun.

Quai vul dir che quels fan 245 dis da fila militar e gia è lur carriera militara a fin. Scolas da recrut d'infanteria avain nus en Svizra quatter ed ina da quellas è gia dapi decennis en la chapitala grischuna, cun il cumanant actual, colonel dal stab Daniel Steiner da Savognin.